

Og tagna' Sulat ni Piter

Og Piuna Talu' pa'ali sog tagna' Sulat ni Piter

Og tigana' sulat ni Piter koni, posungu' ini dia sog ain sinumolabuk na dia ni Kristu, nog iningolanan ilan nog, pinili' nog pigotowan nog Mikpongon, nog mikpokpola' ilan ditu' sog gliwag nog Bata'bata' Asia. Og tugyu nog sulat koni og pondolo'isog dia sog ain og poktanudanan kitu' nog dia ilan sog sinsaan bu sog posakit sabap sog kopokokunut nilan dia ni Kristu. Bu sinulat dosop ini ni Piter po' pipikil non dianilan og Gomba'is kitu' nog Guksugan nog pa'ali dia ni Isukristu, nog bikanan dia sog kopatoy non, sog kopotubu' dianon tidu sog patoy, bu sog pinasad non kitu' nog kopokpuli' non, mimung mokobogoy nog mosolag nog dodomaan ta dianon. Dadi sabap ditu', sumboy tolisma'on nilan bu moglogaga ilan nog sinsaan. Bu sa'an itu' kibianbianan ilan dun po' og suloy nog kopongandol nilan dia ni Kristu. Bu bila mokogaga ilan dun, kosugdaan ilan sog gondow kitu' nog potongowon na si Isukristu.

Dadi, bila ma' nini kipongimogonan ita noma sog timpu nog sasow, og pondolo'isog dosop dianita nog sumboy potongowon ta sog kotubu' ta og kosolabuk ta dia ni Kristu.

1. Og bokna nog sulat koni, *1:1-2*.
2. Og kopokpopikil nog tabang nog Mikpongon, *1:3-12*.
3. Og pomali pa'ali sog polomotadon nog modulus, *1:13-2:10*.
4. Og polosuku'an nog poktanudanan bila kodotongan ilan nog sinsaan, *2:11-4:19*.
5. Og kopokpobaba' nog poktanudanan bu og ginang nilan, *5:1-11*.
6. Og gluksadan nog sulat koni, *5:12-14*.

1 ¹Akon si Piter og mikpoit nog sulat koni, og sosugu'on u ni Isukristu. Og sulat u koni posungu' dia sog ain pinili' nog Mikpongon nog og doksa'doksa' nog mikpokpola' sog gliwag nog probinsiaanan nog Pontus, sog Galatia, sog Kapadosia, sog Bata'bata' Asia, bu sog Bitinia. ²Amu og pinili' sumakup dia sog pigdotu'an nog Mikpongon. Po' ma' nitu' og

potugyuan dianiu nog Gama' ta nog Mikpongon. Bu bianan sog ginang nog Bolakat non dianiu, siniboy non na amu nog mokokunut amu dianon, bu bagun dosop kugasan og dusa niu nog dugu' ni Isukristu.

Posisaya' kongon dianiu og tulung bu kotikna' nog pikilan.

Sa'an songlitan ta Mikpongon po' tumanon nonog dodomaan ta dianon

³Songlitan ta og Mikpongon, og Gama' bu og piktamuy nog Kounutan ta nog si Isukristu. Po' bianan sog kosolag nog glolat non dianita, binogayan non ita nog bogu kotubu' bianan sog kopotubu' non puli' dia ni Isukristu tidu sog patoy. Bu sabap ditu' miimung nog pagon nog dodomaan ta dianon ⁴bu dunut og kopogdodama ta nog malap ta og pusaka' kitu' nog ondi' mogla'at bu di' mokpinda og kolongas non nog sinimpan non na ditu' sog glangit. ⁵Bu sabap sog kopongandol niu dia sog Mikpongon, bianan sog dasig non, pigipat non amu solian niu mogbagad nog tabang non kitu' nog sagad na mokpotongow dun bila matong na og bungkas. ⁶Sabap sog glolatan non dianiu, mokpogda'da' amu, minsan si'oy solian nog numun koni mosinsa amu sabap sog gininisan nog suloy nog sumboy niu pa kobianan. ⁷Og kopongandol niu domikian da ma' nog bulawan, nog og bulawan koyon tunagon pa poguna mangka si'oy poktantu bulawan, si'oy mogla'at da. Tibua, og kopongandol niu, labi pa ditu' kobololaga'. Sa'an itu' sumboy pa mokobian amu nog suloy po' bagun og kopongandol niu ompagon tokodoy nog boya'an mimung kodongya'an amu dun, bu pogodaban amu, bu ompotas amu bila matong na og gondow kitu' nog mokpuli' si Isukristu. ⁸Minsan si'oy da' niu ion kotongow nog dili mata niu, molalam amu da dianon. Bu minsan si'oy di' niu na ion motongow numun koni, tinumud amu da dianon. Bu sabap ditu', miponu' amu nog da'da'an nog di' mustalustal. ⁹Po' numun koni, miktolipun amu na mokotabuk nog doksuan nog kopongandol niu dianon nog ion non ion og tabang non nog glimukud niu tidu dia sog baya' nog dusa.

¹⁰Bu pa'ali sog tabang non koni nog mialap niu na, og polomolatasan kitu' kobon nitu' nog mikpolatas dun, pikpikilpikil nilan kopia bu pinginabut nilan bosia mahatul bog olo doda' og bogoyon kitu' nog Mikpongon dianiu. ¹¹Po' kolegan nilan bosia dun, kosunan nilan bog olo og bianan non bu nanu itu' datong og pigolong kitu' dianilan nog Bolakat ni Kristu. Po' og Bolakat non kitu' dia da nilan. Sinuksugan non dianilan pa'ali sog posunguan ni Kristu kitu' nog ion mosinsa pa poguna mangka si'oy ion potasoy. ¹²Pisabut dianilan nog og polosuku'an nilan koyon nog polomolatas nog talu' nog Mikpongon, kona' nilan dili kobo'isan dun, suga'id non, og kobo'isan niu. Og pilatas nilan, ion non ion og Gomba'is kitu' nog Guksugan nog midongog niu na dia sog ain migustal koni dun dianiu bianan sog

Bolakat nog Mikpongon nog pipangoy non dini tidu sog glangit. Minsan og moloikatanan kitu', moleg ilan dosop bosia mokosabut dun ini.

Og pomali pa'ali sog polomotadon nog modulus

¹³Dadi, sa'an itu' simpan niu og pikilan niu bu koto amu mogokbit nog pikilan niu. Dodomaoy niu tokodoy og tulung non kitu' dianiug sog matong Gondow kitu' nog mokpuli' si Isukristu. ¹⁴Pokokunut amu sog Mikpongon. Bu na' amu na mokokunut dia sog glegan nog dinunya ma' nog polomotadon niu kitu' nog kobon nog sobu' amu pa sog motud pa'ali dia sog Mikpongon. ¹⁵Suga'id non, sumboy kobon non modulus og glam nog polomotadon niu po' og Mikpongon nog migonggat dianiug midulus. ¹⁶Po' ma' nini og talu' nog Mikpongon nog sinulat sog Kitab, "Sumboy modulus amu po' akan midulus u."^a

¹⁷Bila mogyakin amu saka poksobion niu og Mikpongon nog Ama', sumboy longkaon niu kobon non og gondok niu dianon. Po' bila lilingon non og ginang nog glam nog gotowanan, onda'idun og pogbigya'on non dun. ¹⁸Po' kosunan niu bog olo pigbayad non dun nog bagun molokat non amu tidu sog baya' nog polomotadon nog mokogulanganan niu kitu' nog da' doksu' non. Og pigbayad non dun, kona' mama' nog bulawan otawaka og sin nog moglokulang og golaga' non. ¹⁹Suga'id non, og binayad non dun bololaga' tokodoy, po' og dugu' tanan ni Kristu. Ion mama' nog nati nog bilibili nog da' sinila' dun. ²⁰Pinili' ion nog Mikpongon sog da' pa pongonoy og dunya. Bu sog numun koni nog gimpusan na nog gondow, pitampal na ion bagun amu kobo'isan dun. ²¹Po' bianan dianon tinumud amu na sog Mikpongon nog ion mikpotubu' mokpuli' dia ni Isukristu tidu sog patoy bu piotas non na ion. Dadi, og salig niu bu og dodomaan niu dia sog Mikpongon.

²²Dadi numun koni, bianan sog kopokokunut niu dia sog motud, milonu' amu na bu miktantu amu na mololat sog dumaanan niu nog poktanud. Dadi, sumboy og pogopasan niu og mokilolamoy. ²³Po' binogayan amu nog bogu kotubu' nog da' kopus non. Kona' og sagyaotow nog matoy da og migbogoy dun dianiug, suga'id non, og Mikpongon og mibogoy dun dianiug. Po' ginamit non og talu' non kitu' nog totubu' bu di moksop asta sog da' kopus non. ²⁴Po' ma' nini sinulat sog Kitab,

"Glam nog gotow mama' da nog sagya sigbot bu og kolongas nilan mama' da nog kolongas nog bulakbulak. Molanos da og sigbot bu moloklag da og bulakbulak. ²⁵Tibua, og talu' nog Pogbaya' di' moksop asta sog da' kopus non."^b

Og talu' koyon nog pigolong, ion non ion og talu' kitu' nog pa'ali dia ni Isukristu nog pigustal dianiug.

^a 1:16 Levitikus 11:44-45 ^b 1:25 Isaya 40:6-8

2 ¹Dadi, lota'oy niu na og moksina, bu mogbigyak, bu mokpopotongow, bu mogdal, bu glam nog gininisan nog tompola'. ²Bu ilingoy niu ma' nog bata' popula nog moksaba' dumudu'. Amu si'oy, sumboy dosop moksaba' amu nog talu' nog Mikpongon po' kitu' og tantu ponganon niu dia sog kinodiwata, bagun niu modopot og tugyu nog tabang nog Mikpongon kitu' sog kotabang non dianiu. ³Po' minanam niu na og glolat nog Pogbaya' dianita.

⁴Og Pogbaya' dianita pinonggi' sog mosolag nog batu nog totubu' nog pigbongkis nog gotowanan, po' balu' nilan dun da' sagnat non, saka kitu' tanan pinili' nog Mikpongon po' bololaga' dianon. Dadi, pokpolani amu dianon ⁵bagun amu dosop mimung mama' nog batuanan kitu' nog totubu', nog amu og miimung nog polongkapan nog pogonongan nog Mikpongon. Bu siniboy non na amu nog amu dosop og boliananan non. Po' bianan dia ni Isukristu, mokopogbogoy amu nog pomalas sog Mikpongon nog kosu'atan ion dun. ⁶Po' ma' nini og talu' nog Mikpongon nog sinulat dia sog Kitab,

“Tontong niu, pinili' u og bololaga' nog mosolag nog batu, bu piindog u dia sog koliwagan bonua nog Sion. Simasima sumalig dianon, ondi' nododa' kosipogan.”^c

⁷Dadi, amu koyon nog ain tinumabuk na dianon, ion bololaga' dianiu. Tibua, ain og da' nododa' tud dianon, pinonggi' ilan dia sog gotowanan kitu' nog migbongkis dianon. Po' ma' nini sinulat sog Kitab,

“Og mosolag nog batu kitu' nog pigbongkis nog polongimung nog baloy, miimung nog bololaga' nog polongkapan sog glam non.”^d

⁸Bu ma' nini dosop og sinulat,

“Ion og mosolag nog batu kitu' nog mosoksug nog gotow bu ion dosop og batu kitu' nog mokobuksak nog gotow.”^e

Sa'an itu' mosoksug nilan po' di' ilan tumud nog talu' nog Mikpongon. Ma' nitu' og glegan nog Mikpongon nog kobianbianan nilan.

⁹Tibua amu, pinili' amu nog Mikpongon, bu amu dosop og boliananan non, bu amu dosop og dili pigotowan non. Siniboy non amu bagun amu mokokunut tokodoy bu bagun amu dosop mokopoksanglit dianon. Po' inonggat non amu mawa' tidu sog kodoloman mangoy sog kodolagan.

¹⁰Dini kitu' kona' amu pa og pigotowan nog Mikpongon, tibua, numun koni og pigotowan non na amu. Bu dini kitu' da' niu pa tobukoy og glolat non, tibua, numun koni tinabuk niu na.

¹¹Amu, og glokoleanan ku nog bololaga' dianakon, mama' amu da nog sagya doksa' bu mikpoponasan dini sog dunya. Dadi, pongonion ku dianiu nog pogolig amu tokodoy nog glegan nog ginungod nog

^c 2:6 Isaya 28:16. Og batu koni nog pigolong ion non ion si Isukristu. ^d 2:7 Salmu 118:22

^e 2:8 Isaya 8:14

boya'an mokodusa amu dun nog mimung nog luma'at sog glimukud niu. ¹²Polongas niu tokodoy og polomotadon niu dia sog gotowanan kitu' nog di' moktamuy dia sog Mikpongon po' bagun minsan si'oy mondolabak ilan monalu' nog molaton daniu, sintak nilan moktima'an daniu motongow nilan da nog molongas og kohinangan niu nog boya'an sog gondow nog mokpuli' og Mikpongon dini songlitan nilan ion.

¹³Bagun kodongya'an og ngalan nog Kounutan ta, sangkan amu dia sog ain og gotowanan kitu' nog binogayan nog baya' mogbaya', tidu sog motas nog datu' sog glam nog gotow ¹⁴asta sog kodotu'an po' ilan dosop og binogayan nog baya' mongukum sog ain moginang nog molaton. Bu ilan dosop og mogdongya' sog ain moginang nog gomba'is. ¹⁵Po' og kolegan nog Mikpongon dun, bianan sog kohinangan niu kitu' nog gomba'is, mokolota' og gotowanan sumusi dia sog motud. Ilan koyon ma' ilan nog gumowon, po' sinumusi ilan nog minsan da' nilan si'oy kosabut. ¹⁶Bianan sog kopoksolabuk niu dia ni Isukristu, kopogboya'an niu na og polomotadon niu. Tibua, og baya' niu koyon, na' niu imungon nog bianan niu moginang nog di' pia. Suga'id non, langka niu nog amu doda' og sosoligan nog Mikpongon. ¹⁷Pogodaboy niu glam nog gotowanan, bu kololat amu sog pakasi tanud niu, bu kondok amu dia sog Mikpongon, bu pogadab amu dosop sog datu'.

¹⁸Amu, ain guliponanan, sangkan amu dia sog gapu' niu dunut og kopogadab niu dianilan. Kona' tibua mogadab amu dia sog ain og molongas bu moto sumungod daniu, suga'id non, pogodaboy niu dosop minsan og gotow kitu' nog ompasu' og gokbitan non daniu. ¹⁹Po' ain mokogaga nog sinsaan sabap sog glosaman dianon, mosabut non og glegan nog Mikpongon bu ngon da og tumbas dun dianon. ²⁰Tibua, bila pisokitan amu sabap dia sog kohinangan niu koyon nog molaton, minsan si'oy gogaan niu og sinsaan niu koyon, da'idun da og tumbas dun daniu. Tibua, bila posinsaon amu sabap sog kohinangan niu nog gomba'is nog saka kogogaan niu da og kopokposinsa koyon daniu, ngon da og tumbas dun nog Mikpongon daniu. ²¹Po' ma' nitu' og glegan nog Mikpongon daniu. Si Kristu og pononggi'an ta. Po' minsan ion, misinsa dosop bagun amu kobo'isan dun. Dadi, ilingoy niu ion. ²²Po' ma' nini sinulat sog Kitab, "Da'idun dusa non, bu da'idun gloput nog talu' non."^f ²³Dangan piksudi'an ion, da' non da suli'oy. Dangan pisinsa ion, da' non ilan sadoy. Suga'id non, inuakil non glawas non dia sog Mikpongon po' bila ion mongukum, di' nododa' mogbigya'. ²⁴Minanam ni Kristu og sinsaan dia sog kudas sabap sog dusaanan ta bagun ita mogawon tidu sog baya' nog dusa bu bagun ita dosop mokopoginang nog ain modulus. Po' bianan sog gangolanan non miimung kiuli'an amu dun. ²⁵Po' dini kitu' pinonggi'

^f 2:22 Isaya 53:9b

amu dia sog bilibilianan nog mikpoksimo. Tibua numun koni, mikpuli' amu na dia sog Polongipat otawaka Polongokbit nog glimukud niu.

Og pomali sog pomogduoy

3 ¹Amu si'oy kolibunanan, sumboy sumangkan amu dia sog duoy niu bagun da ain og togo duoy kitu' nog da' pa tud sog talu' nog Mikpongon mimung tumud ilan, bianan sog polomotadon niu minsan si'oy di' niu na ilan pogustalan. ²Po' motongow nilan og kolongas nog glangkalangka niu bu og gondok niu sog Mikpongon bu og gadab niu sog gotowan. ³Og glolibunan niu di' dia kotongow sog kopogimakoy niu nog dili glawas niu nog ma' nog ponulopidon og buk niu, otawaka og pomulawan og glawas niu, otawaka og koponapot niu nog mokologan. ⁴Suga'id non, og glolibunan niu sumboy dia kotongow sog kolongas nog dialom pikilan niu nog motongow dia sog glangkalangka niu. Po' og glolibunan nog miktidu sog koba'is nog bolotabat nog gotow ondi' omboluba bu bololaga' tokodoy dia sog motaan nog Mikpongon. ⁵Po' ma' nitu' og glolibunan nog kolibunanan kitu' kobon nitu' nog midulus bu migdodama sog Mikpongon. Sinumangkan ilan dia sog duoy nilan ⁶ma' ni Sara, nog mikokunut ion dia ni Abraham bu og poksabi non dia ni Abraham og “kounutan ku”. Dadi, bila omba'is kohinangan niu bu di' amu mosompun kigla'oy nog ain kondokondok, amu si'oy domikian da nog ma' amu nog gombata'anan ni Sara.

⁷Amu si'oy kolokianan, sumboy kosunan niu bog olo gomba'is nog kopogokbit sog duoyan niu. Bu sumboy sungod niu bu pogbotadoy niu og duoy niu po' da' amu nilan pogbatuk kotasig. Bu ilan si'oy kobogayan ilan dosop nog kotubu' ma' niu nog bianan sog tulung nog Mikpongon dianiu. Bila ma' nitu' og ginangon niu, da'idun og mokobagla sog gyakin niu dia sog Mikpongon.

Og sinsaan niu kobal niu moginang nog gomba'is

⁸Sog doksuan, poksolabuk amu nog pikilan niu. Unungoy niu og pakasi niu bu pokilolamoy amu po' og pomogilug amu sog tanud. Langka niu og glolat niu bu pokpobaba' amu nog bolotabat niu. ⁹Bila kiinangan amu nog molaton, na' niu na suli'an nog molaton. Bu bila tompola'on amu, na' niu na suli'an monompola', suga'id non, suli'oy niu ilan nog popia. Po' ma' nitu' og glegan nog Mikpongon dianiu bagun amu mokopomusaka' nog popia nog miktidu sog Mikpongon. ¹⁰Po' ma' nini sinulat sog Kitab,

“Simasima moleg nog kolongasan bu motanam kotubu' non, sumboy ondi' moktal' nog ain di' pia otawaka og gloput.

¹¹Sumboy bolongon non og kohinangan nog sinoitan mangka non inangoy ain gomba'is. Sumboy kobon non ponontongon non

og kopoglogomigus. ¹²Po' ain modulus, kobon non pogipaton ilan nog Pogbaya'. Bu og gyakin nilan inongogan non kobon non. Tibua, ain moglokohinangan nog sinoitan, tolikudan nog Pogbaya'."§

¹³Sima gidoy buan mokopongula'at daniu bila mogapas amu moginang nog ain gomba'is? ¹⁴Tibua, bila gomonsunoy posinsaon amu kobal niu moginang nog gomba'is, og doksu'an non popiaon amu da dun. Na' amu mondok nog kopongula'at nilan koyon daniu. Na' amu kigla'an dun. ¹⁵Suga'id non, potigbung niu dia sog pikilan niu nog si Kristu, ion og Pogbaya' daniu. Bu kobon non simpan niu og gustalan niu sog ain moksak daniu nog pa'ali sog dodomaan niu kitu'. ¹⁶Bu sumboy og kopogustal niu dun, omba'is og bolotabat niu bu dunut og gadab niu dianilan. Bu kobon non potubudoy niu og kohinangan niu bagun da omba'is og pikilan niu, bu bagun dosop ain og mondolabak monalu' daniu sabap sog ginang niu nog gomba'is bu sabap dosop sog kopokokunut niu dia ni Kristu, kosipogan ilan nog ponolu'on nilan koyon. ¹⁷Po' sog baya' nog Mikpongon, golom pa bila mosinsa ita sabap sog kohinangan ta nog gomba'is gaba' nog mosinsa ita sabap sog kohinangan ta nog sinoitan. ¹⁸Po' minsan si Kristu, insan da ion patoy sabap sog dusaanan ta. Og midulus sinumoliu matoy dia sog bolodusaonanan bagun non amu koponulu'an sog Mikpongon. Og glawas non dini sog kilawan binunu', tibua, dia sog kinodiwata pitubu' da ion. ¹⁹Bianan sog glimukud non, minangoy ion mogustal sog kolobusuan nog glimukudanan nog gotowanan kitu' nog mikpomatoy na. ²⁰Og glimukudanan kitu' nog pigustalan non, ain og mikpomungyas kitu' dia sog Mikpongon kobon nitu' sog masa pa ni Nowa. Kobon ni Nowa mogimung nog gagyung kitu' og Mikpongon migbagad bosia nog moksop og pikilan nilan. Saka, dangan midoksu' gagyung bu migdupi' na, walu kotow da sinumolod sog dialom nog gagyung kitu' bu mitabang ilan bianan sog tubig. ²¹Og tubig kitu' nog pigolong, ion non ion og glogyawan nog bunyag dianita numun koni. Og ma'ana non, kona' da sagya ugasan og glawas ta, suga'id non, og kopoksobonal ta dia sog Mikpongon. Po' mogawon og gotowanan tidu sog baya' nog dusa bianan sog kopotubu' dia ni Isukristu tidu sog patoy. ²²Ditu' na ion sog glangit dia sog dapit glintu nog Mikpongon. Po' ion na og Pogbaya' nog moloikatanan bu og duma bolokatananan dia sog kodiwotaan.

4 ¹Si Kristu misinsa sog kinilawan. Amu si'oy, mosinsa amu dosop ma' non. Dadi, sumboy popogonon niu og pikilan niu ma' da nog pikilan non kitu'. Po' ain og mokogaga nog sinsaan sabap sog kopoginang non nog kolongasan, da'idun na og pikilan non moginang nog dusa. ²Bu

og kotubu' non dini sog glupa'an koni, da'idun na og baya' nog glegan nog ginungod dianon, suga'id non, og migbaya' dianon og glegan na nog Mikpongon. ³Po' mitaman amu na moglokohinangan nog kohinangan niu kitu', nog kolegan moginang nog ain di' kitu' moktamuy dia sog Mikpongon. Po' moleg ilan moginang nog polomotadon nog kosipogsipog, otawaka mogabak, otawaka glibun laki dianilan mokpoglangulangu mangka ilan poginang nog kosipogsipog, otawaka moktamuy sog sagya glodawananan kitu' nog pigondi'an moktamuy dianilan. ⁴Sa'an numun koni mingala ilan daniu po' da' amu na ampu' dianilan moginang nog kohinangan kitu' nog mama' nitu'. Sabap ditu' pigwanwan nilan amu dun. ⁵Tibua, sumboy tobalon nilan itu' dia sog Mikpongon po' ion og mongukum nog ain totubu' bu ain mikpomatoy na. ⁶Po' minsan si'oy inukum na ain mikpomatoy kitu', og koukuman kitu' dianilan ma' da nog koukuman nog glam nog gotowanan dini sog dunya nog sumboy matoy ilan. Sa'an itu', og Gomba'is nog Guksugan koni pinulonag dianilan bagun ilan da mokopoglokotubu' sog kinodiwata mama' nog kotubu' nog Mikpongon nog motubu' asta sog da' kopus non.

⁷Mosompol na og doksua'an nog glam non. Dadi, sumboy posopaton niu og pikilan niu bu koto amu mogokbit nog pomikilan niu bagun amu mokopogyakin. ⁸Og bololaga' sog glam non og kopogapas niu mokilolamoy. Po' bila ma' nitu', og pogopasan niu sog pakasi niu sog tanud, minsan si'oy andun kodakol og dusa otawaka og sala' nog miinang nog pakasi niu, kolonggungan niu da. ⁹Tolima' niu og pakasi tanud niu nog da'idun buku' nog dialom pikilan niu. ¹⁰Bu monala kotow daniu, sumboy mogusoyusoy og kopogokbit niu nog kotoan kitu' nog binogoy nog Mikpongon daniu, bu gamit niu itu' bagun kobo'isan dun og pakasi niu. ¹¹Bila binogayan amu nog kotoan momali, sumboy og poktolu'on niu og talu' nog miktidu sog Mikpongon. Bila binogayan amu nog ginang tumabang sog pakasi niu, sumboy inangon niu bianan sog dasig nog miktidu sog Mikpongon. Sa'an ma' nitu' og kopoginang niu dun, bagun da og glam non koyon, og Mikpongon kosonglitan dun bianan dia ni Isukristu. Po' dianon og glam nog kotas, bu og silow, bu og baya' asta sog da' kopus non. Amen.

Of sinsaan sabap sog kopokokunut ta dia ni Kristu

¹²Amu, og glokoleanan ku nog bololaga' dianakon, na' amu kosobu'an dun nog mokobian amu numun kitu' nog landu' kopihit nog sinsaan. Po' ion non ion og suloy daniu. ¹³Suga'id non, sumboy mogda'da' amu nog kiunungan niu og sinsaan ni Kristu nog boya'an bila potompalon na og kotas non, mogdungag og da'da'an niu dun. ¹⁴Bila pigwanwan amu sabap sog kopokokunut niu dia ni Kristu, pogda'da' amu dun, po' kobon non og molongas kitu' tokodoy nog Bolakat nog Mikpongon mogonong

dianiu. ¹⁵Bila mosinsa amu, sumboy kona' po' sabap nog polomunu' amu, otawaka og polonakow amu, otawaka kona' sabap sog ginang niu kitu' nog mondom ukumon amu dun, otawaka mangoy mogbaya' sog ginang nog duma niu. ¹⁶Tibua, bila misinsa amu sabap sog kopokokunut niu dia ni Kristu, na' amu mosipog dun. Suga'id non, songlito' niu og Mikpongon po' kiingolanan amu na nog gla'ayatanan ni Kristu. ¹⁷Minatong na og tolipunan mongukum sog gotowanan bu og mokuna ukumoy ain og pigotowan nog Mikpongon. Dadi bila tolipunan dianita, olo gidoy og doksuan non bila ukumon ilan nog saka da' ilan pokokunut sog Gomba'is nog Guksugan kitu' nog miktidu dia sog Mikpongon. ¹⁸Po' ma' nini sinulat sog Kitab,

“Bila gahatgahat kotabang og gotowanan nog midulus, olo gidoy og doksuan nog gotowanan nog ompok tumamuy sog Mikpongon otawaka momungyas sog talu' non?”^h

¹⁹Dadi, simasima mikobian mosinsa sabap sog baya' nog Mikpongon dianilan, sumboy uokilon nilan og kotubu' nilan dia sog Mikpongon mangka ilan kobon non poginang nog ain og gomba'is po' ion og kopongondolan.

Og pomali sog pigotowan nog Mikpongon

5 ¹Ngon og pongonion ku sog ain og mokogulanganan kitu' dion nog ma' nakon. Og dili mata u og mikotongow nog sinsaan ni Kristu. Bu akon si'oy mosunu' u dosop sog kotas ni Kristu sog matong potompalon na dia sog gotowanan. ²Ma' nini og pongonion ku koni dianiu, pogipat niu og glumpukanan nog pigotowan nog Mikpongon nog ain dia sog gipatan niu. Bu sabap sog koboganan nog pikilan niu, pogokbit niu ilan po' ma' nitu' og kolegan nog Mikpongon dianiu. Kona' po' togolon amu moginang dun nog bagun amu kongonan dun. Suga'id non, sabap sog dili glegan niu pogopasoy niu tumabang og pigotowan nog Mikpongon. ³Na' niu popihitoy ain og inuakil koyon dia sog gokbitan niu, suga'id non, sumboy mimung amu nilan nog pononggi'an. ⁴Bu bila matong na og motas sog glam nog polongipat nog pigotowan nog Mikpongon, mokotabuk amu nog tumbas dianiu landu' kolongas nog di' mogla'at asta sog da' kopus non.

⁵Amu, ain og mulinbata', sangkan amu dia sog mokogulanganan niu. Bu glam niu langka niu og kopokpobaba' nog bolotabat niu sog pakasi niu. Po' ma' nini og sinulat sog Kitab, “Og Mikpongon, ontuan non ain bugalon, tibua, ain ombaba' bolotabat non, tulungon non.”ⁱ ⁶Dadi, bianan sog kobaba' nog bolotabat niu, sangkan amu dia sog baya' nog Mikpongon bagun non da amu ompotas bila matong na og gondow kitu'

^h 4:18 Proverbs 11:31 ⁱ 5:5 Proverbs 3:34

nog glegan non. ⁷Uakil niu dianon og glam nog susaan niu po' ion da og migipat daniu.

⁸Pongmohilat amu bu pongandam amu po' og banta niu nog si Kindagow, pinonggi' ma' nog glimong nog kobon non monontong nog kanon non. ⁹Ontuoy niu og banta niu koyon bianan sog kopagon nog kopongandol niu dia sog Mikpongon. Po' kosunan niu da nog og pigilugananan niu sog tanud sog gliwag nog dunya koni sonuk nilan pa dia sog sinsaan ma' niu.

¹⁰Tibua, bila modoksu' amu na moglogaga nog sinsaan nog podali'dali', og Mikpongon nog ion og poktiduan nog glam nog tulung, pongimboguan non na amu bu popogonon non da amu bagun amu di' gumuya'. Po' inonggat non na amu sumakup sog koba'is non asta sog da' kopus non bianan sog kopoksolabuk niu dia ni Kristu. ¹¹Ion da og mogbaya' asta sog da' kopus non! Poksonglitan ta ion! Amen!

Og gimpusan nog sulat ni Piter

¹²Si Silas, og gilug ta koni nog kosoligan ku, og tinumabang dianakon sumulat nog sulat u koni daniu nog ompolok. Og sulat u koni, og pondolo'isog u daniu bu taksi' u pa'ali sog tantu nog tulung nog Mikpongon. Dadi, popagon niu og kopongandol niu sog tulung non kitu'.

¹³Og pigotowanan nog Mikpongon nog pinili' non mama' niu ditu' sog bonua nog Babilon, minogina ilan daniu. Bu si Mark si'oy, ion ma' nog bata' u, minogina dosop ion daniu.

¹⁴Bila moglumpuk amu, potongow niu og glolaman niu sog pakasi niu bianan dia sog galok nog pomogilug.

Og kotikna' nog pikilan mongon daniu ain sinumolabuk na dia ni Kristu.